

持人菩薩所問經卷第一

常三

西晉三藏法師竺法護譯

陰種諸入以了道慧四事品第一

聞如是一時佛遊王舍城迦隣竹園中與大
比丘衆千二百五十菩薩不可計一切大聖
神通已達辯才無礙慧不可量諸根寂定見
一切本應病與藥靡不蒙濟爲法橋梁度脫
三界爾時世尊與無央數百千之衆眷屬圍
旋而爲說經時持人菩薩即從座起正服長
跪前問佛言菩薩何行建立誓願無限功勳

曉了諸法分別一切諸度無極識解無量方
便善權弘持要慧被不可喻戒德大鎧真正
道義爲衆生願弘恩仁慈覆如虛空不可測
度其心清淨德行具足布施持戒忍辱精進
一心智慧普度無極若有衆生欲奉斯業殊
特之原無上大道今故爲斯如此等類啓問
如來菩薩大士諮問如來言教處所周旋三
界所行備悉勤修禁戒無所志講奉清淨行
遊居成辦遵無極慧無量方便隨時開化爲
此衆生有心存法不能自達故問如來何謂

常三

菩薩曉了諸法能以隨時爲人頒宣其心堅
強力念不忘致微妙慧解一切法章句義理
所生之處常識宿命不中忽忘至成無上正
真之道爲最正覺佛言善哉善哉持人菩薩
多所哀念多所安隱愍傷諸天及十方人乃
爲一切諮問如來如斯要義功勲之德不可
盡極決一切疑猶豫羅網以大弘慈加於衆
生顯示大明現在將來諸菩薩施行無盡哀
爲衆生故普現大道興舉弘誓將護一切爲
欲開發化濟衆厄今得自歸使度彼我拔濟

衆生不墮三惡勤苦之獄乃以勸之使立大
道無上正真欲脫衆生生老病死啼哭之惱
憂困之患使長安隱將來最後末世流布正
法消伏恐懼令無所懼諦聽諦聽善思念之
持人菩薩與諸大衆受教而聽佛語持人菩
薩有四事義觀其言教曉了諸法能以隨時
爲人頒宣何謂爲四心念成就逮致正真志
存道法未曾忽忘性行柔和庠序仁慈其心
所興與衆殊異是爲四復有四事何謂爲四
分別道義決諸種姓曉了衆行義理所趣宣

布一切諸法至要達諸法本隨而開度是為四復有四事何謂為四解無央數所行諸法以行超越暢無量法所當應宜剖判所行無底功勲識別諸法因斷諸習是為四復有四事何等為四因其正行逮無上正真之道疾具足成道行之法三十七品通達諸法自然之智無所依仰解權方便成一切愍是為四復有四事何謂為四心離穢垢不懷慳嫉以是恩仁攝衆生類其戒清淨所行鮮明常奉精進未曾懈廢勤修清淨建立成就曉了順

行專思道業是為四復有四業何謂為四志性清淨所願鮮明所行功勲至德清淨忍辱仁和建立雅妙以逮顯明無所不照分別經義暢入道門是為四復有四業何謂為四夙夜勤修求一切智志存一心定意正受曉了脫門奉于大哀無極之慈喜護濟厄逮致深慧修清淨行暢達正義解了道行是為四復有四業何謂為四遵承智慧所行具足聖明清淨志願弘大愛樂至德無所罣礙慧心存普未曾捨行是為四復有四事察言觀義心

第三

三

誓堅固何謂爲四其意堅強所求具足性行
安詳所思備悉其行究竟不斷道念修四意
止成就雅德是爲四復有四事察言觀義志
存堅固何謂爲四意以德立心念佛道業品
之法三十有七意根通利曉了往宿無央數
劫所生之處意以平正聖慧清淨無能毀斷
疾成佛道攝取至真佛一切智是爲四復有
四事何謂爲四察識方便慕具慧義曉了勤
修顯真諦慧緣是親近得至佛道所行精進
未嘗忽忘是爲四復有四事志性堅固何謂

爲四常奉精進不遠佛道志性安和能制其
意普解諸法未曾放逸解暢衆道諸根寂定
常應經義不違佛教是爲四復有四事志性
堅固何謂爲四立清淨戒所行無穢去五陰
蓋不爲所蔽心無所著未曾懈怠蠲除衆罪
所滅塵勞是爲四復有四事志性堅固何謂
爲四心不憤亂求正真法方便安心順一切
法曉了隨時不失儀節所生之處不貪家業
志存沙門是爲四復有四事志性堅固何謂
爲四常親善友遠惡知識志慕深法未曾放

逸歸命諸佛諸菩薩俱諮問禁戒曉了諸觀
是為四復有四事觀義察言普解法句何謂
為四逮眾方便了諸道業解諸法門因緣報
應志上慧義分別佛道解暢諸法章句所趣
是為四菩薩復有四事觀義察言曉了分別
諸法章句何謂為四解暢宣布真實言教敷
演諸法無所不達剖判諸法方便具足明知
諸義本所從習是為四復有四事觀義察言
何謂為四奉行聖慧分別道業逮得勢力宣
布諸法速成佛道清淨之慧明度無極晉以

備足是為四復有四事分別諸法何謂為四
曉了所習精進修行消滅因緣靡所不了因
其逮得應得之力隨時勤修奉受正典是為
四復有四事分別諸法何謂為四曉了萬物
一切無常分別萬物本因所習精練諸物皆
歸滅盡解知無常便修道業八正真元是為
四復有四事分別諸法何謂為四曉了眾行
合會諸習分別一切滅盡諸習逮得因緣無
極大力方便斷別合散之行是為四復有四
事分別諸法何謂為四解暢諸義言辭所趣

曉了衆義不從他受敷演諸法一切衆相慧
印之元今一切法立無相慧是爲四復有四
事所生之處常識宿命心念不忘至成無上
正真之意何謂爲四諸根明利暢善惡法以
了他人意念是非一切陰蓋咸得休息所生
之處常念不忘第三存在無上正真之道是爲四
復有四事心念不忘至成正覺何謂爲四常
行定志曉習方便智慧通暢明慧爲首明所
行觀無所不觀分別道慧光明遠照是爲四
復有四事心念不忘至最正覺何謂爲四逮

得總持無所生慧以得超越永盡聖慧以消
滅慧觀于三界以無底慧觀見三世是爲四
復有四事所生之處常識宿命無能亂者至
成正覺何謂爲四以斷結著莫能亂者口之
所言未曾闕漏皆達一切諸所有業悉是無
爲逮得佛行無極大道是爲四佛於是頌曰
其心念成就 志性常明了 未曾忽忘法
由是致正覺 曉了一切法 柔和行仁慈
以達諸法無 解無央數行 遵承真智慧
聖達已具足 去心之穢垢 未曾懷嫉妬

方便以隨時 分別無上慧 志願甚弘大
乃至最正覺 其意得自在 道品三十七
心根以通達 識宿無數劫 知苦所由生
習因本根元 一切所有盡 解之悉本無
以菩薩正法 開化三界厄 使諸無明者
皆通無上道

佛告持人菩薩有五事行清淨力逮斯德何
何謂爲五以仁和性奉淨慧力所願清淨聖
明慧力德本清淨道力無量所誓清淨則是
慧力休息罪業慧力清淨是爲五清淨慧力

復有五事何謂爲五其力以暢威儀禮節斯
念成就清淨慧力善權方便曉無穢力爲衆
生故聖力解明以通達力勤修瑞應是爲五
復有五事清淨慧力逮是一切功勲之業何
謂爲五布施清淨則謂慧力救攝衆生則清
淨力建立大慈則淨慧力心懷大哀則淨慧
力以無極喜護淨慧力是爲五復有五事爲
清淨力逮是功勲何謂爲五其戒清淨成無
權慧以戒禁行救濟慧行以忍清淨莫能懷
恨以淨慧力救濟無勢博聞清淨力靡不通

第三

六

是爲五復有五事具諸功勲何謂爲五以精
進行志性慧力以能勤修應清淨慧一心慧
力疾得定意了禪定慧以寂然淨察三界空
是爲五復有五事逮是功勲何謂爲五智慧
清淨博聞無厭以見世力得度世力强而有
勢救脫劣弱以聖明力曉了清淨以淨慧力
暢達有無生死無爲是爲五復有五事成聖
明力逮是功勲何謂爲五以承智力剖判諸
觀以曉了力究竟本淨慧明解脫以成聖力
盡無生慧致于道力以一相慧自然清淨用

智力察所有本淨是爲五佛告持人菩薩大
士常當奉行如是比像清淨之法佛於是頌

曰

五力無能當 乃致清淨慧 五陰蓋消除

神通自然成 布施持戒忍 精進一心慧

常三

六度本無形 行者空有名 道行爲一切

七

諸有不達者 解三界猶幻 乃致無從生

佛告持人菩薩大士有三事法雖在盛色以
法淨力常勤修慧何謂爲三好樂道法精進
不倦行無放逸是爲三復有三事在於色法

慧力清淨疾成佛道至一切智所以者何勤
精進者無放逸本成就諸法以是清淨速致
道力速成精進一切敏慧行不迴轉以不迴
轉究暢道法成就功德已成功勲疾速諸法
通達慧力以速是者則世衆祐便致暢畢無
礙之德乃行如來速得聖慧觀如來不久證
明如來道慧佛告持人佛往宿世行菩薩業
無央數劫爲燈光佛所見授決最後究竟速
如是像清淨慧力所度無極若有菩薩致是
慧者便轉法輪我亦如今所轉法輪暢師子

吼亦復若斯以致斯慧便於諸法而得自在
已得自在便成大道若欲速是無極道慧當
學是法亦不復久當疾得佛無極正覺
妙慧超王佛品第二

佛告持人乃往過去久遠世時無央數劫不
可稱限越是無量爾時有佛號妙慧超王如
來至真等正覺明行成爲善逝世間解無上
士道法御天人師爲佛世尊其佛世時諸聲
聞衆不可計數其諸菩薩無央數會皆是其
佛本學道時至願所致佛國清淨功勲巍巍

其佛國土無三惡道趣八難之處衆生安隱
福同快樂皆離貪欲除去五蓋如是比像無
世俗義唯以道品而相娛樂以四禪定而行
正受佛言持人其妙慧超王如來壽八十億
姪百千劫其國土人壽三十億姪當爾世時
無有國王典制萬民唯以妙慧超王如來至
眞爲法王咸共稱曰無上道王其妙慧超王
如來至眞諸菩薩衆能爲一切普決疑網多
所歡悅頌宣菩薩無極法藏時諸菩薩聞佛
所說如是比像清淨法力五百菩薩一心精

進夙夜懇懃不想念坐不想求食盡其形壽
不念服飾唯念至眞無極道王思是像法清
淨法力以是一心德本所致於彼壽終生於
東方去是佛土八千億國適生未久亦逮此
法識念不忘悉見宿命叡哲聰明諸根通達
無所不覩探古知今又其佛土佛號無量華
王講說經法是五百人生彼佛土尋時其身
年如十六即報父母出家捐業行作沙門淨
修梵行在於佛所奉行精進六十億歲佛語
持人於彼世時五百菩薩如是比像值見諸

佛二十有億普在其所夙夜精進妙慧超王
如來至真使五百人於萬劫中值二萬佛而
授其決當逮無上正真之道以億萬劫供養
奉事二萬佛訖是五百人皆同一劫次第成
佛是故持人菩薩大士速欲逮成無上正真
為最正覺當精進學如是比像清淨慧力經
典之要夙夜勤修勿得懈廢為放逸行所以
者何諸佛本學皆由精進無逸為本致最正
覺普具道品佛皆識念往昔古世精進如是
見十二億諸佛世尊所生之處當得意力探

帝三

九

古知今無所不通各各識知一切宿命如近
不遠悉觀見之皆由精進學是法故無放逸
行夙夜勤修未曾懈廢爾時世尊以無極慈
興大悲哀觀于四方即如其像三昧正受化
現諸佛周遍三千大千世界各為衆生頌宣
經道決諸狐疑聞各開解莫不歡悅復重為
演菩薩法藏爾時世尊尋現神足顯其威德
使竹園中諸會菩薩皆見十方諸佛如來在
其世界敷演經法時諸菩薩各從座起叉手
自歸為佛作禮各自歎曰至未曾有諸佛世

尊威德聖慧不可思議道法超殊巍巍無量
猶如虛空不可攀逮時佛即告諸菩薩曰是
不爲難如來至真不可限喻所以者何族姓
子解諸法界無所不達所解法界如來至真
其一毛德神足變化不可稱限光明普照江
河沙等十方世界其光明中各演音聲頌宣
經道其一毛孔億百千姦神足變化不足爲
難所以者何如來至真神足功勲不可限量
巍巍如是又族姓子如來至真見衆生心以
爲說法少有信樂如是像法精進勤修志樂

慕求是無量法亦復希有所以者何如來今
興在五濁世何謂五濁一者人多弊惡不識
義理二者六十二疑邪見強盛不受道教三
者人多愛欲塵勞興隆不知去就四者人壽
命短徃古世時八萬四千歲以爲甚損今壽
百歲或長或短五者小劫轉盡三灾當起無
不被害若有在此五濁惡世能信樂是如斯
像法深妙道義有一人好能受如此佛正真
慧是爲甚難至未曾有何況信樂如來所行
而受持乎族姓子佛徃往古無央數劫被大

德鎧長夜導習如是像法精進忍辱仁慈博
愛若見衆生在於厄難勤苦之患無救護者
心懷恐懼墮於惡趣願生彼土導利衆生救
濟衆厄令入正道如來至真德不可量如空
無侶勇猛獨步度脫十方是佛往昔過去世
時本願清淨今有信樂是無量法深妙之義
愛喜受持皆往古昔曾見被訓故今信喜現
人少有信樂於斯如來所顯如來十力四無
所畏十八不共諸佛之法空無之慧希有好
喜入斯法者若有入斯皆是如來威德所致

神足變化勇猛功勲佛以慧力善權方便長
夜開化勤修不懈皆由往宿兢兢一心不捨
此法常行大慈修無盡哀大喜大護救濟衆
生又族姓子諸菩薩學少有愍念於五濁世
成最正覺爲諸衆生在五濁世開導大難亦
復希有如吾於今所立教訓所以者何往古
宿命通大精進積功累德每生自剋布施頭
目肌肉肌體妻子國邑群從車乘無所愛惜
不計身命無所貪慕三界無怙唯道可恃以
無極力行權方便開化衆生能成無上正真

第三

十一

之道佛悉憶念往昔世時一日之中所施無量并惠身命無所愛惜皆由愍念衆生之故開化盲冥今見道明亦識往昔無數世時見饑饉者無有飲食供養之具可用施者割己肌肉煮之炙之持用授之不以作惠心不懷恨唯行大哀愍傷衆生奉無極慈以是之故當作斯觀遵修如是通大精進開化衆生如斯精進積累功德逮致無上正真之道是故諸人諸族姓子勤學如是微妙精進以習如是無極道法亦當如我往昔所行菩薩之業

開化衆生如是無異頌宣經道亦如我今有所救脫是賢劫中所興千佛皆當咨嗟吾本所行各當說言能仁如來本行精進不可限量不可班喻道慧巍巍所度無極於五濁世五逆亂中開化衆生如是無窮不可計盡是故族姓子假使有人如是比像奉精進行愛樂勤修而無放逸疾成正覺又吾於是逮無上正真道爲最正覺臨滅度時所度無量若有能遵如是精進應如至教而不懈廢取如芥子佛之舍利建立塔寺皆當得佛滅度之

業所以者何佛興愍哀爲諸將來衆菩薩施
本爲菩薩行佛道時曾所訓誨由是緣故顯
示大道又復慈愍墮八難者故興大哀普布
舍利若取舍利大如芥子建立塔寺面見如
來手自供養滅度後自觀其舍利心懷悅豫
所立地處以是地施於佛舍利而興塔寺隨
心所願興于大哀本宿命時行菩薩法等心
衆生誓願所致舍利徧流佛所積功累德光
光不可限量巍巍如是愍念衆生興于大哀
最後末世立無極慈加於一切若有菩薩愛

是像法好喜慕樂勤修精進而不放逸用至
願故最後末世愛如是像弘雅經典能持講
誦爲他人說令普流布建立菩薩若有持誦
爲他人說以是像典勸諸菩薩令學諷誦轉
復宣布所以者何若是景模久在天下則佛
正道永長現矣如來常存以是觀之族姓子
佛本往世如是方便攝護衆生建是經法以
用將養未來俗世在五濁世宣布斯典若族
姓子所在郡國縣邑聚落州城大邦如是像
典所流布現受持諷誦廣爲人說如是學士

族姓子等見佛現在臨滅度時如來遊彼佛
則現在而不滅度所以者何族姓子佛不曾
說乎佛者法身若見法者則觀如來莫以色
身觀於如來若信正典聞見受持則觀如來
聞則奉行住如法教乃曰見佛聞宣正典順
法入道乃曰見佛佛以未曾以法生法以能
行法敷演正典不懷妄想倚求諸法則觀如
來一切諸法悉無所著爾乃名曰觀如來耳
若族姓子不見諸法則觀如來所以者何如
來至真不存有法非法之辭不當以法觀見

如來所以者何如來曾說假引譬喻猶如縛
棧尚當除法況非法乎以除是法非法之行
乃見如來所以者何如來至真皆除諸法不
宣諸法而有處所也無所興起亦無名號況
復講說諸處所乎所以者何皆除一切諸法
名字若能順斯如來觀者則見如來也佛本
以斷一切諸法乃觀正覺所以然者一切諸
法皆虛不真觀一切法本無本淨觀真諦者
乃見如來又族姓子不得諸法則無諸法謂
無放逸彼無有法亦無非法以無有法亦無

非法乃了斯義以了斯義乃見本淨以平等
觀乃見如來見法如是則見如來觀如來然
見平等覺若有異觀如來至真則為邪觀已
邪觀者則為虛觀不真諦觀也又族姓子其
真諦者消除一切音聲言辭不真不虛亦無
真虛蠲去一切諸所有業悉不復得一切所
受乃見如來所以者何如來至真不觀諸法
有所生者若今生者以除一切所見諸法乃
曰自然以解自然如是觀佛乃謂吾等觀佛
如是所見若斯佛之所說也如是觀佛皆入

一切諸法本無已了一切諸法本無便了諸
法一切本無興顯道法分別諸行一切本淨
一切諸法歸于本無一切諸法皆如來法也
自然入道一切諸法皆以普入如來境界一
切諸法界不可議成最正覺故族姓子佛說
言一切諸法皆如來界無有境界為如來界
所以者何一切諸法所有境界計彼諸法無
有境界則如來界也一切諸法以為境界無
斯諸界乃曰有界所有界者亦如來界一切
衆生行無境界而悉曉了真諦淨界雖知是

法永無解達如來至真解達如是無所不通
是故名曰無有境界也如來界無所有界則
如來界也所以者何佛說諸界真諦本末無
有諸界乃如來界一切諸界如來界也無界
非界分別曉了靡所不達是謂證明無所有
界則如來界也唯族姓子解一切法是無境
界則如來界也乃入道義觀如是法爾乃逮
致如來境界樂無所樂是如來界而無所著
亦無憎愛所以者何以知無界乃曰佛界故
言無有界則如來界用一切法不可得故無

有處所於一切法無所著故是則名曰如來
境界遊居入慧一切諸法悉無所入故無六
門亦無所入所以者何族姓子皆無有門亦
無所入則無有見所以者何如來至真不得
諸法有所入處也而有所見也有所說者也
亦無善惡麤細微妙言辭本末是則名曰入
一切法入無有相無應不應一切諸法不精
進不懈怠不合不散是乃名曰一切法門曰
無名門無言辭門無所入門無所著門無訓
誨門無生門永寂然門不以是門可用知法

卷三

十五

若見法者不以法門能證諸法亦無所出入
所以者何一切諸法皆無有門門不可得一
切諸法爲虛僞門一切諸法悉本清淨一切
諸法門不可量一切諸法無斷不斷無有邊
際故曰族姓子一切諸法悉不可得皆虛無
實一切諸法門不可量不可得限其本際門
不可盡極無能斷壞得本際者若壞本際眞
實之義也若族姓子及族姓女至斯法門悉
解達了因得晉入一切法門皆能頒宣衆生
心念時佛復告持人菩薩若有菩薩大士欲

以方便解一切法分別諸法義之所趣欲得
意力具足成就隨時之宜入於諸法所生之
處心無斷絕若以寂定心念成無上正眞之
道志習入斯比像法門若能逮得是法門先
勤學斯法速疾歸附

持人菩薩所問經卷第一

永樂北藏

持人菩薩所問經

第三九冊

音釋

鎧

可亥切

甲也

諮

問即

移切

訪

也

剖

晉后

切

鎧

都

膝

叡

以芮切

深

兢

居陵

切

貌

兢

析也

朕

至移

切

朕

薄

房越切

達也

兢

不自

安貌

貌

兢

析也

朕

至移

切

朕

卷三

十六

持人菩薩所問經卷第二

常四

西晉三藏法師竺法護譯

持世王品第三

佛告持人乃往過去無央數劫加復越是不
可計劫爾時有佛號意普王王如來至真等
正覺明行成爲善逝世間解無上士道法御
天人師爲佛世尊其佛世時有八十億姪聲
聞衆皆阿羅漢諸漏已盡習學不學阿那含
斯陀含須陀洹亦復如是各八十億姪諸菩
薩八十四億兆載集會佛所佛言持人彼時

如來壽八萬歲時世有王名曰持世君二萬
國民人熾盛風雨時節五穀豐饒萬姓安隱
王所居城廣長正方各四百八十里其城皆
以琦珍四寶成之其牆七重樹木深澗欄楯
周匝各復七重網縵珠珞各復七重諸牆壁
上及諸行樹皆以四寶交露帳幔而遶圍覆
其二萬國各有五百郡縣屬之又其樹上皆
生好衣自然七寶諸細被服一一池水各有
五百浴池從之又其浴池皆七寶成生七寶
蓮華青紅黃白滿其池中其華大如車輪斯

池中水自然八味其土國王有八萬四千夫人
娑女中宮正后有二太子一名無限量意二
名無限量其太子各年十六時二太子適卧
寐於夢中見如來形像端正姝好紫磨金色
相好莊嚴威德巍巍不可限量光照十方夢
中見是心中踊悅欣然無量其二太子從夢
覺已心中坦然各以宿懷識道正真而歎頌
曰
我今夜夢見 天中最勝 體紫磨金色
百福成其相 以在其夢中 觀一切功勲

以得觀尊顏 懷悅豫無量 觀聖神光明
猶日演暉曜 意中甚歡樂 超越一切衆
威光極高峻 猶如寶山王 若目觀其相
靡不抱欣喜
佛告持人其二太子見是瑞應往見父母具
說此意我等兄弟第四今日夜夢中見如來至真
故啓二親欲往奉詣如來興現在世教化以
來久矣我等放逸沒五所欲不覺佛興而爲
五陰之所結縛諸蓋羅網之所覆蔽在於自
大無恭恪心以斯迷惑不見如來諮受道慧

二親然之時二太子啓父母已往詣意普王
王如來所前稽首足白世尊曰罪蓋所覆迷
世榮祿邪位所惑不時奉覲諮受訓誨慙愧
被顏世尊太哀威光見照開發愚冥乃得奉
現今欲請佛菩薩聖衆盡斯三月供以飯食
衣服牀卧具病瘦醫藥一切所安其彼大城
園觀樓閣父王所居嚴飾莊校懸繒幡蓋浴
池蓮華啓其二親貢上如來諸菩薩學諸聲
聞等供佛聖衆竟盡三月一切所安父母同
心亦皆哀之供養盡節辭其二親在如來所

信不慕家出家學淨行作沙門時意普王王
如來至真見二太子捨國出家察其志性則
爲二人無限意無限界頒宣於斯曉了菩薩
五陰衰品二太子聞咸共啓受八萬四千歲
未曾睡眠亦不思食復不寐卧唯坐思議經
行諷誦八萬四千歲未曾起想有他異念常
正精思暢五盛陰了之虛無本末恍惚悉空
不實存不顛倒是五盛陰以解如是不能覺
者迷惑其中當修梵行思是法已解達深義
不見盛陰之所歸趣志存大猷無所希冀壽

終之後生兜術天其時如來滅度之後從兜術天下還生世間閻浮利地大長者家至年十六夜卧夢中見如來像在於夢中復從如來聞如是法曉了菩薩斯五盛陰諸種入品從夢覺起心懷悲喜於一萬歲淨修梵行復分別了是五盛陰諸種入品終而復始壽終之後生忉利天適生尋復終沒還生世間在梵志家見本宿世意普王王最後末世餘正法訓留一千歲以宿本德信不慕家出家爲道博學廣聞智如大海曉了盛陰諸種衰入

求其本末覺如真諦時方便勸立二萬世間人二萬億天人皆發無上正真道意以是因緣其二太子行菩薩業俱共和同見十億姪諸佛至尊最後末世逮得無所從生法忍更復值供億姪兆載諸如來衆二人俱等於一劫中逮得無上正真道爲最正覺一號無量音二號無量光是故持人若有菩薩疾欲得成無上正真道爲最正覺當勤修學如是像典如來所暢諸陰入種分別有無諸法之元十八種品第四

佛告持人何謂菩薩曉了諸種若能分別十八諸種而順思惟識別于觀眼種本末則無眼界悉空無我我所而不久存眼種虛無則曰自然用眼自然故曰不真因迷惑思想而共合成眼無所成不得識行為虛空形猶如虛空悉無所成悉無所有亦無處所眼無內外亦無中間欺詐之業無有真實不可護持從因緣生無去來今則為自然本淨無形罪福所成從顛倒興為現在緣之所見縛故曰眼空界不可見計於眼者則無有界識遊其

中因曰眼界眼根清淨其色是曜合于意根因緣所縛三事合會眼色識集眼界空其眼界不成界無界其明智者乃覺知之是故菩薩分別眼界解了真諦以了色本則無所有何謂以了色無有界不與色會亦不離矣無所生長雖說色界則無所有色無處所何以故云色無有界色無有色無內無外亦無中間立存虛無因其思想眼觀色光眼種清淨以見好色假號曰色無得有處猶如明鏡見其面像無垢清淨反想有色雖見鏡中有形

色影乃從內出不從外入用外形照內鏡乃現眼亦如是以用清淨雖由于色爲之見縛觀夫面像以見色空色之自然無有境界而不可取悉無所成其色相者本無所生衆生不解適見色已其以解色界無所生則無有界以解色界了色本末無去來今虛無自然歎詠光斯緣合所謂也色界如是以眼識故真諦觀者知之無界云何觀之無眼識種其眼色者則無處所本淨所致眼色叵得悉無所有眼識無法假號現耳眼識不合無真實

形眼識之界因顛倒雜從宿世成現在因緣之所見縛與因緣會號曰眼識用衆生在顛倒若至聖見分別了之眼識無界所以者何眼無所成十二因緣起對合生託於所作假號眼識慕樂識行起所習行合成于識雖有所覩皆虛不真託有形相因緣現耳宣說眼識使衆生了如來頒宣分別衆形諸想合成故曰識無所成眼以清淨識之本相因行所趣故曰所見雖習眼識故曰無界所以者何眼不求斯我得眼識及與不得了之色識無

獲今自然所以者何無所成故也假託有言而現斯義爲衆生故救攝危厄眼本所行意念是地識相自然眼界色界識界三事合成諸界集會因緣業相宣諸法會故有託眼色識如是計惟是以使入衆生達彼無眼無有色界亦無識界如是所教除斷諸著若能有了如來所達覺衆方便則能曉解一切三界則無有界所以者何計於諸界實無有界色不可得耳聲識界亦復如是鼻香識舌味識身觸識意法識計校思惟觀無所成意界虛

無不有真實悉無所有又是種者則無所成猶如有人下種在地稍稍生芽水爲因緣日光照之其種所芽無所造行其種不與芽共合成因種生芽種不離芽芽不離種意界如是從其意業顯現種矣故有意界意不離念第四念不離意意界雖別因緣合成其意界者無六內無外意無中間皆由宿命本行所立悉由意業因界合會現在因緣之所合生故假曰意從已所部罪福所生十二緣起顯有所宣故曰意界方便說之欲令衆生解其本末究

竟求之實無本末不可得之所以者何心自
放逸無處所所有至識柔軟言辭其意界者
悉無真諦無有過去當來現在明者曉了意
界無界法界無有何謂觀察法界自然悉無
所有而不可得法界無成不得形像唯顛倒
立無有人壽從虛偽生與受識矣故曰法界
何謂曉了法界之無顯現其界所以者何其
法界者則無所有從因緣生以因緣生故曰
無界所以其界因緣合成轉成顛倒如來至
真解衆生界故曰法界託集假號法界無內

亦無有外亦無中間然住合結除善不善法
斷一切諸議宣布道教故曰奉行論無所有
法界虛空無成就形假有號耳法亦如是無
所成像以斷法想取現要說悉無境界故先
歎之無去來今爲現在緣而見繫縛從緣合
成衆生不解明者曉了而證明法界無界不
多不少則以方便因言法界其了法界皆除
一切三界所生以斷諸法無說法界因緣言
相用處諸法故曰究竟明者宣曰無所生相
所以者何法界之想悉無所成法界無處無

處非處無合住處亦無不住察了法界永無所住法界無生無能者無合會處無合無散法無所造亦不成就以能如是觀法界者則察意識而無有識當作何觀無所生界則曰識界所以者何計其意識無所有故虛偽不實合于顛倒從意念有故曰意識由因愚冥凡夫所行唯賢聖達見知之耳以二事宣意識所緣用衆生類不能解了明者所別皆從虛無不真正想所生意識其意識界無有殊特頒宣究竟假託有言借于衆生不解意識

本末無界因緣所集輪轉無際諸賢聖等不求識界無內無外無有中間明者曉了其意識者不觀意識皆從緣起從顛倒興以二因緣而有衆生不真思想受於虛偽從心行生隨順俗相有意識耳衆生本心從是緣現意識無去當來現在意識計本亦無所著意識所在無去無來無所存立意無所住所以者何意識本淨則無有二無相無二所在立處而不可見明日曉了意識如是其意識者無有法說無有合會亦無離別無所生相無言

教相獨賢聖了何謂識界從所來者無所從來無有因緣所以者何其意識界從因緣生察其本末無有見者明者曉了意成如是本無有作衆生自造悉無所生衆生所出相無所生佛言持人若有菩薩當作是觀曉了意

常四

識則無識著

曉三界品第五

佛告持人菩薩大士以曉意識則不著欲界色界及無色界當作是觀雖在三界不見欲色無色之界既有是界悉暢無界頌宣光顯

衆生本末在於欲界而自示現在色無色而自示現在是諸界現無有界相示要說曉了諸法自然無界三界之事無形無處從因緣生流於三界輪轉無際智者分別頌宣三界所有境界悉無所有從虛無合顛倒而有是能覺了則解虛偽自然永無便捨生死衆生以除顛倒之業便棄三界如來至真頌宣三界衆生所在悉無有界無知習之迷惑作是本淨自然而無有界不倚三界明者解之此無有界觀是三界衆生無界己身虛空無有

若干一切諸法從因緣生從顛倒合假有號耳則無所成空而無作自然清淨等御虛空於一切界悉無所有猶如虛空悉無所有所以者何究竟永無虛空本淨而不可獲一切諸界亦如是矣無內無外無有中間界無有界悉無所著皆無所生諸明智者不有所生亦無所得無住無不住不等不邪本淨無獲智者明了不獲假託無念不能由是智者不以諸界爲境界也相無所生隨俗名耳無所分別以無生相若滅是已無一切界假有言

卷四

九

耳究暢本末悉不可知以不可知一切亦然明者所觀佛言持人若有菩薩暢了如是解十八種及與三界衆生之界及己身界上虛空界達之平等以觀如是則應平等不見境界以無所見解一切界假託言矣一切諸界悉無有界好喜入道曉了諸界解說衆生其相無二以見無二並見諸界以權方便頌宣示衆十二因起假託有言開化衆生入究竟義以暢見慧一切諸界故曰無形所以者何持人如來至真不得一切諸法處所亦非無

得無所亡失平等思惟遠得無上正真之道
所以者何一切諸法永無所有本悉自然無
成就者諸界皆空觀實空無以等如空無所
生相如來如是解一切界如來不云諸界自
然無界無形所以者何其無所有不可強有
以無所有則知自然持人當知如來所說若
有曉了諸法所來其菩薩大士便能分別一
切衆生境界本末以解本末分別麤細頌宣
諸界合散之義諸界所入曉無自然一切諸
界虛空界還自燒然無界無入假託有辭永

不可得衆生無知故有是耳猶如幻師工學
其術爲諸衆生現若干變以現諸化不可計
形若干種人不能知者聞信所化謂之實有
其曉知者知幻自然佛言如是若能曉了幻
化虛無衆生欺惑若有明智自解已身猶如
幻化了之假託是世若斯自然如幻若有菩
薩曉了入是暢幻自然以解自然世之所居
亦復如是以權方便爲衆生類現說一切悉
如幻化若有聞見解了幻法皆無所有乃至
正真其愚冥者不能達之故爲頌宣暢一切

法若了諸法一切如幻欲入是義便當學者
深要之法不求得色以不得色便不斷除說
其不斷除一切界皆爲假託演諸合散分別
諸界宣權方便所造因緣根源本末剖判真
諦現世度世有爲無爲有順無順諸應不應
宣權方便究竟盡言有義無義所暢因緣而
說分別處所無處皆當達是一切如幻

諸入品第六

佛告持人何謂菩薩曉了諸入於斯菩薩觀
十二入解其本末云何觀之所可觀者淨不

見眼之所入處眼無成就悉無所有所以者
何眼所入者皆從緣對從顛倒興色之所縛
緣起所合有二事因一曰眼入二曰從對生
色故曰眼入如是眼色有二倚著眼色所入
色是眼品目見色已以幻爲門故曰諸入則
盈生受眼不著色色不著眼色不著色目不
著目皆從緣起以色爲緣故號色入目以見
緣對故曰有相以入爲業何謂入業由以顛
倒用以豐饒以如究竟不得入眼諸色之無
其明智者不求諸入便見真諦從顛倒合愚

十四

十一

冥凡夫有二相矣眼以入色便顯入諦已解
真諦色入於目無內無外無有中間其眼衆
色無去來今現因覩色現目覩色則貪受耳
愚冥凡夫所行不可明智達之虛無無真思
想顛倒便成諸入諸入自然云何有乎其入
無相皆從緣起故曰諸入如來曰諸入虛無
悉從顛倒託於因緣無有諸作無使作者眼
不名色色不名眼亦無所知各各寂然眼色
諸入俱共憺怕無有作者從因緣起愚冥凡
夫心處顛倒賢聖達之然無所生無所滅矣

無來無去眼色諸入眼不斷眼目不想目色
不捨色便知自然色不想色所以者何各各
空故各各憺怕知自然故眼不倚眼色不知
色自然之故眼色自然無成就者眼不求眼
亦不合散各各空無目不習目是我所眼色
不習色色是我所幻自然相眼色虛無則曰
自然假託言矣耳聲鼻香舌味身更心法而
不可得悉無所有亦無所成所以者何從因
緣起處在顛倒立在二因從心法興諸品入
故故曰諸入以法因緣假託入門法不著心

心不著法法不著法心不著心著從緣起以立法事因心見相不得入法明智達之求諸入本觀見真諦皆顛倒合愚冥凡夫見有二相無內無外亦無中間心不入法法不入心無去來今皆從緣生愚者不了明智達之所

本四

十二

水普無所不入其十二入亦復如是所云內外皆從因緣其水流至多所成就雖言自然不得處所以見縛著其諸入者向塵勞門愚冥凡夫不斷塵勞故曰入門眼著于色耳鼻口身心亦復如是無所歸趣菩薩大士曉了自然分別諸入已分別入悉除眾結如是持人菩薩大士曉了諸入

十二緣品第七

佛告持人何謂曉了頌宣諸入十二緣起而觀十二以何觀之以用諸法悉無明業故名

曰癡不了無處故曰無明不解諸法有生無明故曰爲癡以不了是何故無明無明緣故有行若不達法不行是法故曰無明緣故便有行有行緣故生其識故曰從行致識有其二相致名色矣故從識緣而生名色從名色便生六入故曰從名色緣得致六入因有更故曰從六入緣便生所更因有痛癢故曰從所更緣致有痛癢則生恩愛故曰從痛癢緣便生恩愛從恩愛緣生所受故曰從恩愛緣便生所受從所受便生所有故曰從所受緣

便致所有從所有便致生矣故曰從所有緣便致所生從所生緣便有老病死啼哭愁感不可意法大患苦會故曰從生致若干苦以何等故合是衆惱以無明故習諸顛倒從恩愛行忻樂貪欲其心在在樂慕不捨是則世俗十二品有緣起自閉盲冥無目無明羅網志存疽癰入於幽闇無明爲首十二緣以觀如是了斯無明虛僞不真又其本際而不可知何以故不可知不逮明故用無明故其生本際而不可知若有明智當觀察之曉了本

際則達無際不起思想亦不無想便斷衆想以斷衆想故不倚無明一切諸法不達無明是諸法者不云無明自大之心所以者何以捨無明以故名曰一切諸法皆爲無明矣以能覺了一切諸法皆無明者則達明業不更致明以消無明則曰明業何謂消無明者解一切法悉無所有一切諸法皆虛不真處存顛倒法無所有假託有耳是則名曰以斷無明亦斷有明明與無明悉虛不真所曰無明用無明故有衆行業便致十二愚冥凡夫所

不能達自投邪冥悉無所有反造所有故曰爲行無處無言不言不知明亦不冥諸行之業悉本空無所法無有反行所有故曰無明之緣便成諸行其行無常從是非業故衆行來又察衆行無去來今其無明空分別無明諸行本空行悉自然行無所著因其無明故生諸行其無明者不著諸行明行不斷無明便消行不除行是行無明則發闇蔽處存顛倒無明叵得則曰自然行不可得亦曰自然用幽冥塞故曰無明用冥無明便立行耳若

十四

十四

法無無明無所有以虛僞法便成無明行識
行無所著行不起識行所以者何行不知行
行無有法所可至湊從行生識成衆顛倒其
行與識無內無外亦無中間無起識者方以
行逸生其識耳彼若明智求識不得識無所
生亦無所見不別於識名色六入所更痛癢
愛受有生及老病死憂感啼泣痛不可意大
苦陰會輪轉無際生死不斷投于五江四瀆
之間不能自濟曉了無根悉無所著無致無
極平等之業觀十二緣亦復如是斯名曰明

明無二故勤精進求一切諸法以慕諸法無
想不想是柔順明入十二緣是爲持人諸菩
薩衆曉了頌宣十二緣起在合會緣有所生
起分別無會是曰逮得解無所生曉了緣起
觀十二緣不當察生不至權慧若能達知十
二緣起無所生者乃曰曉了逮無生慧是故
持人菩薩大士欲入無所生慧建立證明當
分別暢十二緣起而奉行之以餘奉行於諸
緣起而無所生以作是觀乃謂逮得無所生
慧以能逮得無所生慧造立證明乃曰逮得

常四

十五

無所從生曉了道慧是故持人菩薩大士如是行者於所生緣而無所生悉斷三界因緣證明觀無所生若有菩薩至無生相便疾逮得無所從生法忍轉得親近菩薩之行已身所奉面緣諸佛而受道決當逮無上正真之道爲最正覺得決不久以近受決又以自己如是色像奉行佛教是諸正士各便受決得許信樂分別一切世間諸法以度方俗曉了十二緣起之元以達緣起諸佛世尊現在目前不復恐懼諸魔波旬若見現在陸地水中

一切諸物觀見生死已度眾厄拔無明根如是比像永得安隱觀見正士佛言持人若有菩薩如是解了吾我所有皆因緣故若有聞是曉了十二緣起本末信樂不疑諸如來所成其根源不久受決得無所從生法忍以受決本不久皆於諸如來所便得道決當逮如來無上正真之道爲最正覺

持人菩薩所問經卷第二

第三九册

持人菩薩所問經卷第三

常五

西晉三藏法師竺法護譯

三十七品第八

佛告持人何謂菩薩曉了意止若有菩薩分別觀察行四意止何謂四意止自觀其身痛癢想法亦復如是何謂自觀身痛癢相法於斯菩薩自觀身行察如真諦無常苦空非身之要身為瘡病危厄像害以用樂習動搖逝去荒穢不淨以觀如是若干瑕疵滿是身中九品瘡孔夙夜流出臭處不淨猶如便廁諦

觀如是無如毛髮可樂可取不淨穢濁皮覆其肉筋纏裹之從罪福成積聚眾著便有盛陰何謂積聚何謂盛陰皆宿世緣有是盛陰由本倚慕虛偽覆之沐浴文飾謂是我身由是積聚結存盛陰何謂盛陰從因緣起而報應成從造行轉因于四大計身本末非真之有受于四大而成色陰因得假託所以名曰身者何已自造作故故曰為身心以依之故曰為身罪福所為故曰為身從思想生不肖可賤與行業合故曰為身從因緣成身適小

常五

安便復壞敗不得久長不可常存尋當別離
故曰爲身身無內無外亦無中間雖立迫惱
身不知身亦不可見不爲解明不得度岸無
有思想猶如草木瓦石之類身不成身以作
是觀以立解達則不貪身無所慕樂知身爲
患身無過去當來現在非身是身身如聚沫
澡浴文飾是身如宅八十種蟲是身迫惱無
數百病是身無救三苦困厄所云苦者生死
之患別離之難是身苦器受諸危厄以作是
觀思惟順義則不貪身不慕他人無所志樂

是身無我唯有便利身無所有悉無有實是
身以空自然虛無至無真正虛僞立耳結在
無益從本行成雖有是身則非我身當興專
精慕求不貪已能觀察己身壽命不得合散
不見往返住立處所不覩過去當來現在無
想不想悉無所著不倚身命身非我有亦無
我所則無所受不合不散無所從來今心惱
熱不知所趣計身本末無所起生住立滅盡
菩薩觀身如是無身已了身虛若身欲盛輒
自消滅身意則止立存順行如義觀身便無

有身佛告持人何謂菩薩觀身痛癢若有菩薩察身三痛樂痛苦痛不樂不苦痛計其痛癢不知所趣無去無來唯從虛無因緣合成受罪福報由顛倒興知痛本無因思想立作是觀者不得痛癢無去來今不見處所其過去痛了空無我亦無我所無常堅固悉顛倒法過去痛空憺怕無想當來現在亦復俱然乃知痛癢不得成立無形可獲各自分離其痛癢者無有起者亦無所滅亦無處所無內無外愚冥凡夫由從顛倒而生痛癢罪福報

應適合便離故曰痛癢悉空恍惚虛詐之法以觀如是從痛因緣得心處所痛會有意必歸滅盡不見痛癢所合聚處心自念言痛癢則空自然無形不見所生痛無所生亦無有滅無有成想以無有成想已無有相相無所生字三普觀如是身所痛癢則無所倚解知痛癢真諦本無以斷痛癢離諸入痛不與共合不著痛癢衆行寂然速求方便速三昧定菩薩察行痛癢如是見行以了則觀十方佛告持人何謂菩薩觀心意行若有菩薩觀心念行

發意念頃察于心法若存異變以能觀者心自念曰其心未曾有所奔逸無所至到異緣所使遣所湊相心所興發亦不成就亦無形貌悉不可得心無往返立無所處無去來今以因緣現而有所念其心計之無內無外無有中間有所迫惱心無處所無自然矣不可成辦心無所斷若有所斷心以名曰若干種變使不計之生相即滅持念無住處心無存處所在已能覺是則無心念亦無所見所以者何又其心空自然無形無有衆生又無所

有不得處所無合心者無有散者心無過去無有當來不得中間無能見者心不自然心不清淨心不知心心不斷絕心無有心則曰本淨處在顛倒愚冥凡夫以虛因緣教在諸相心自發念又其彼心空無吾我而計有身心存有常長久永安以顛倒法而自投冥觀心如是速得柔順心意止也心無想念亦無不想曉了其心而無所生無所生想所以者何心無所發不得真際不得其相心相不起明者所解分別達之知心所習所趣歸滅審

知如有作是察心不肯合習無滅歸處以不得心若不得心況復所習所歸究竟以是之故心不想滅亦非無想逮心清淨心已清淨不墮塵勞不爲汙染所以者何知除所有心則清淨衆生心亂便染塵勞心淨則淨以能知除心自念言心有塵勞以是之故計衆生行心有所著便爲塵勞心以解明則致清淨已作是觀不得欲塵心不得淨心爾乃達了心本清淨菩薩如是觀心意行便通本淨佛告持人何謂菩薩心存在法觀其法行若有

字五

菩薩觀一切法不見內法不見外法不處中間有所迫惱法無過去當來現在因十二緣而生有之諸法顛倒法無成就又察其法無有內外亦無中間法無合散一切諸法悉無形貌無所有無不有託有音耳一切諸法猶如虛空亦若幻想生自然本清淨明諸各有所倚塵勞一切諸法無所覩見察其真實猶如夢中所見覺無所覩一切諸法猶如照影本淨無形亦無名想諸法無思一切諸法如呼聲響從虛無立諸法則無自然之故不可

得矣諸法野馬無所有故以能如立觀諸法者愚冥凡夫見若干變則知無法則不用法無合無散以見諸法永無所著以作是觀見一切法無往無返不見諸法之所立處所以者何無處非處一切諸法從因緣起處在顛倒輪轉無際無言不言無有二相亦非一相第五不有小相明者所了而不可得亦非不得所以者何諸法不生亦無所起無造無作不得作者諸法捨形相亦無身貌亦無自然自然成矣諸法無數本真諦故以作是觀解一切

法無有吾我無人無命察于空無心自念言一切諸法悉云本空法以自然亦無有想不見衆想不造法願察一切法以無所生自心念言法無所起亦無所滅以觀如是得法意止於一切法了無所生知歸習盡因法相成自然以離則無有相所以者何無有能成其無相者乃捨相耳諸明達者分別覺了是一切法悉爲本無若有菩薩當作是觀諸法法行以作是行不得諸法亦無所生不起諸法有所住止亦無所滅一切諸法悉滅度相諸

相寂然相亦憺怕菩薩如是觀見諸法了法
意止也無有止處無所不止悉入諸法慧明
之相自察心念致法意止是則名曰頒宣經
典於一切法而無所住敷演諸法攝濟以慧
斯曰於一切法所觀真諦逮法意止佛言意
已止者便至意斷身意痛意想意法意解三
界空亦不見身及痛想法則四意斷佛告持
人菩薩若有逮解五根度俗世本順諦察之
何謂爲五根一曰信根二曰精進根三曰意
根四曰定根五曰慧根是爲五根當觀是行

云何觀之信一切法從因緣起立有顛倒虛
無合成展轉不定猶如車輪所遊無際亦如
所夢自然退逝信一切法無常苦空無我非
身疾病瘡痍老不長存不得久在當復別離
諸法不真皆無有實恍惚捨放等於諸根猶
如彩畫如小兒力思想欺戲以爲真實不知
虛詐悉無所有其信根者一切諸法無去來
今無去來亦無所住空無相願無起無行無
想不成戒清定淨慧解度淨知見品淨以能
奉斯信根行者則不迴還篤信爲首建立禁

卷五

六

戒悉無所失不違道業以無所失便順正法
住於篤信無能動搖善惡報應咸來歸護則
立直業而無諛諂斷諸邪見六十二疑不求
外學以爲師主如見日月不用燭火唯歸如
來識知聖衆善具足成立淨禁戒忍辱仁和
如是篤信而不動搖以無能動甚懷義信便
具道法佛告持人何謂菩薩觀精進根云何
具成曉了方便若有菩薩篤道不違以精進
故休息五蓋設值得聞如是景模深妙經典
勤修奉行夙夜精進不抱怯弱心不忘遠志

慕博聞無罣礙法以斷諸蔽不廢精進若心
生念惡不善法以大精進而蠲除之識法已
興建立勤修未曾懈倦無倚精進攝加勤修
不以此行有所違失而不還返所遵徬務曉
了諸法分別如應不戴仰人在於世俗不失
精進以斯進根最有威德以義勤學得號進
根佛告持人何謂菩薩速得意根云何曉了
奉行意根若有菩薩制止其意順施戒聞具
足梵行究竟戒品清淨之業定意慧解度知
見品淨身口意究竟謙恪建立止意在一切

法今無所生住存殊異而察至行苦集盡道以除斷斯存立意止方便解達根力覺意一心定意三昧正受解暢諸法而無相願得不起慧致忍辱聖離欲滅度以得意止具足佛法不行聲聞緣覺地也奉無礙慧心不迷惑以能專精如是像法身口謹慎不失其意不依仰人察如是法最有威德逮得正本是謂曉了逮得意根何謂菩薩逮定意根云何曉了斯定意根若有菩薩以行禪思一心不虛行賢聖業禪心無所著以無逸禪善攝定意

明解正等曉了定意無顛倒禪觀定意門以暢不亂入于寂志從三昧起不復定意亦無正受以能慕樂志立道業而以禪思因用自娛不須仰人禪思正受不隨禪教以逮威德定意一心不貪利養行不憤鬧以最威德逮定意根所度無極佛告持人何謂菩薩行智慧根云何曉了逮智慧根若有菩薩滅身所行為何謂也盡除衆苦常消身行在在行慧普見離欲滅集盡道向無爲門以行慧根皆觀三界一切熾然知三界苦其智慧者不倚

三界察之悉空無相不願心無所生無所復
行觀者有爲悉放捨之如救頭然具足佛法
專習諸法雖處三界戢滅一切悉放捨著而
於三界悉無所慕斷諸所樂捨諸有爲一切
滌汙愛欲縛結心無所著不慕五樂不著欲
界色無色界心抱智慧聖明功勲不可限量
猶如江海所行至誠而無涯底曉了諸法則
以智慧分別三界悉無所著是最德義奉於
智慧所度無極佛言持人何故曰根所曰根
者義無能動故曰爲根以無所動無所逸馳

故曰爲根永不迴還不依仰人義無伴侶順
隨法教故曰爲根不恥他人莫能搖者無所
雜錯故曰爲根如是持人斯則菩薩曉了諸
根又復持人菩薩分別衆生諸根善學方等
知衆生根不染者有欲無欲根有瞋恚無
瞋恚根有愚癡無愚癡根知墮惡趣若生人
間根知生天上十方佛前根心明達若柔劣
及中間根悉見知之下賤麤獷諸根不具若
不損根而悉知之諸根應法有方便根無方
便根悉復知之有罪無罪根倚著根無著根

危害根無害根悉當知之隨順根不隨順根
有礙根無礙根欲行根色行根無色行根暢
諸善根究竟善根悉能知之所歸趣根仁和
根處邪見根立正見根慳貪根無慳恡根悉
能知之卒暴根無卒暴根迷惑根不迷惑根
速疾根賢和根忍辱根瞋恚根懷嫉妬根無
嫉妬根具施根信根無信根貪欲根離欲根
居家根捨家根戒具根毀戒根悉能知之誠
戒根無誠戒根清淨根忍具根恚恨根上精
進根懈怠根亂心根取要根定意根智慧名

第五

九

根失智慧根具聖明根愚騃根無所畏根自
大根離自大根逮得道根從邪見根心安和
根放心恣意根悉能知之散意根寂靜根起
生根無所生根清淨根瑕穢根解明根顯曜
根聲聞根緣覺根菩薩乘根佛乘根皆曉了
知以逮得是則謂得力云無等侶無有放逸
謂不迴還致善方便名曰意根知諸天龍神
阿須倫迦留羅真陀羅摩休勒人非人根最
爲威尊無能勝者莫能動搖所行方便普度
無極奉行勤修如是像典疾逮曉了於一切

法而得自在遊十方界無所不濟佛告持人
何謂菩薩曉了道乎云何致道耶若有菩薩
奉八聖道一曰正見二曰正念三曰正語四
曰正命五曰正業六曰正方便七曰正意八
曰正定何謂正見若有菩薩斷除一切諸所
邪見所以者何一切所見上至泥洹若欲見
佛皆去是等諸所見業乃曰正見以無見不
受見成名諸見悉無所倚普無所念以無顛
倒無所無想是曰正見所見平等爲何謂也
捨世虛妄以棄邪見以如是法除諸所覩住

于正見悉無所著無想不想不見泥洹遠諸
欲見不習諸見何謂正見一切寂然無生清
涼亦無所滅等觀無爲本以清淨於一切法
無所希望亦無不想無所不應是曰度世正
見何謂正見不得現在亦不度世正見斷現
世法亦及度世不想現度除一切想不得等
邪等諸不等斷諸等行是名度世乃曰正見
如是一切悉無所生故曰正見見所眞諦正
見無邪是曰正見如是持人菩薩大士所行
正見何謂正念如眞諦解一切所念皆是邪

想及思無爲佛法聖衆所以者何斷一切想所思平等故曰正念以無衆想故曰正念所以者何消一切思名爲察正則無有邪不復懷想乃住正念不得所思離邪正想故曰正念以除諸想等棄衆念捨虛顛倒消想不想等一切念不倚諸念除諸邪想故曰正念何謂正語一切言辭皆爲虛妄處在顛倒昏迷惑想見於平等心自念言正斷一切言辭所宣故曰正語言無所湊無去無來所見如是等無有異已逮正語口之所宣皆實至誠故

曰正語口言清淨所住之處斷一切教言辭辯才心中覺了口無所宣悉捨邪言住於正語何謂正業以住正業皆知一切衆邪之業其一切業不真不諦本無所作所以者何一切諸業無有至竟業悉散故故曰正業不於正不於邪不於是非無想不想皆度衆業不造正邪等逮諸業無作非作故曰正業皆能等說邪正諸業如真諦解一切諸業亦真諦見無應不應是謂正業其以正行無有邪業等見諦行故曰正業何謂正命知一切

本第五

十一

命皆墮返邪所以者何其想有命想有萬物而懷望想無爲泥洹清淨之想及想見佛一心清淨以住是中欲以淨命皆墮邪業一切諸命若正性命不以爲邪不懷正命是曰正命言是邪命逮一切命悉成清淨是曰正命解一切命無有正邪住淨命行無有放逸無正邪命無雙無隻無應不應是曰正命無住邪者逮得淨命無有命想無善無言無命不命等行真正而見不虛是曰正命何謂正方便棄衆邪便所以者何一切方便皆墮反邪

方便所在心在結著是曰邪方便所以者何一切諸法無真邪方便所行方便則不真正其不真正名邪方便無方便矣無究竟無言辭斷諸方便彼無所有棄泥洹想無佛法想知行方便一切方便悉不真正至無方便其以平等則無方便等一切法無有若干無有方便超越方計所有方義則無所諦無應不應是正方便方便叵得此之謂也所言方便是謂定意斷諸方便謂衆真諦等見如是不想方便以無所想是正方便何謂正意一切

所念皆爲邪想意之所念皆是邪思所以者
何一切墮邪彼若意生皆曰爲邪意無所念
所以者何一切所念從因緣立所曰因緣皆
曰邪矣其意所念不起不滅是曰正念所以
名正念若無意念住發起業不意無意意第
一淨無邪意念皆斷衆思其以邪者悉無意
念是住正意其正意者不正不邪正念邪念
除一切意諸念思想所曉了者心不起亂常
行六事曰住正意意未曾生有意未意想解
一切意皆了諸意暢如真諦不復思念有意

第五

十二

無意應與不應是住正意無意無邪念于等
行無念不念無因無思無所惟念一切無望
逮致無言無意不意住思平等無言無說棄
一切辭解如真諦普無宣教無思無想是乃
名曰住于平等何謂正定見一切定皆爲邪
定所以者何若受三昧因緣之想望正著除
斯皆邪定所謂取反此定不真若於諸受而
無所受又不懷求三昧定想無出寂教無念
定意其無所倚無作無暢消斷喜悅永謐安
樂分別定想於三昧定而無所住是乃名曰

正定三昧所謂正定於一切定而無所著則
 無放逸明了如慧曉達定意不倚定行而無
 希念等消正行以如是者無想不想不想無
 想乃曰正定無正無邪一切無望以斷諸想
 並滅衆希乃曰正定所云定者無正邪定心
 無所生不正無邪無正定無邪定所以者何
 以普覺解方便諸定乃住正定無三昧想不
 積平等普曰一切乃曰正定其不馳騁不造
 等逸若等若邪普等諸法一切定意以存正
 受一切三界皆是有為所思真諦以慧觀見

一切五趣往來所生佛言持人如是菩薩曉
 了道義以逮如斯剖判道趣若斯聖業解暢
 真諦乃曰正定

持人菩薩所問經卷第三

音釋

沫莫割切湊倉奏切趣莫割切癢戈支切恍恍惚
 晃晃切惚惚切呼呼切骨骨切切切仿音力戢阻立切獷古猛切
 也也馬五駮切謐莫橘切騁丑郢切馳馳走也

持人菩薩所問經卷第四

常六

西晉三藏法師竺法護譯

世俗度世品第九

佛告持人菩薩何謂菩薩得曉了知現世度世經典之要云何名曰現世度世若有菩薩常順思惟現世度世云何順思何謂現世法何謂度世法若有住於顛倒法行皆從想有由因緣生合於虛妄有二緣立從二想生一從虛妄二從無生其虛妄語欺迷惑法得愚冥相猶如小兒執若干種畫於虛空虛妄經

行愚冥凡夫想云有世計其世俗皆歸壞敗糜散悉盡以見一切世俗諸法從虛欺惑所因無作本無所生陰種諸入皆從緣對色聲香味觸由因緣法不說色緣猶愚凡夫心有所倚所以諸見因無數見而有倚著若彼種性於存窮匱今世間見處在顛倒所覩世法度世在彼爲何所是世俗之法真諦如有達其本淨是爲度世明不求世了不可得度世亦然若不能得現世度世亦無現世及度世業宣其度世現世本淨何謂宣布度世之業

常六

若世本淨至于度世所以者何永不可得現
世本淨悉空寂然其世亦然本以自然世本
淨寂以世自然世淨寂然計世俗法無究竟
成當作是觀現世度世悉不可得不得度世
不著於世不念度世以不念世及度世者不
與世諍所以者何以覺曉了世間悉虛欺詐
惑法以能觀見世倚虛無不想於世不慕度
世所以者何佛言持人所云世者謂五盛陰
也貪求合會一切世法明知求陰永不可得
五陰自然而不可得五陰本淨亦不可得五

陰無來去無所至湊處不可得是曰度世不
知五陰所歸處所也以無五陰諸種本淨及
諸兼入之本淨也若有菩薩觀於世俗之法
悉無所見以合度世不見度世不與世合則
無有世唯觀度世在于度世不見世法而有
異特也不轉二法云是世俗是度世法所以
者何持人其所在世解世本末本無所有度
世亦然雖見有世悉無世法所作分別度世
俱同以了無世假使有人心自念言世俗別
異度世不同則於其人佛不興世雖佛出世

普世顛倒無發道行用真正解以慧察世頌
宣經法處世顛倒貪受于世而救濟之故曰
度世也是故持人用真正解以慧察之曉了
世倒故曰度世也如來出世普通諸法世俗
度世皆無有二以真正慧觀察造證故爲宣
布度世之法佛言持人不以是法遊於世間
無所至湊無所消除不倚世諍乃得世義不
念度世曉了世辭達本所想以著想二不解
能達如是像法則無濟者不能解了不暢度
世所以者何用二行故其二行者不能解了

世俗度世菩薩如是方便曉了一切諸法現
世度世靡所不達

有爲無爲品第十

佛告持人何謂菩薩曉了分別有爲無爲法
云何有爲無爲法若有菩薩以真正觀有爲
無爲順理求之云何順理云何求之亦不作
有爲法有所見者自然得號已造有爲故曰
有爲又有爲法以虛僞轉云何爲轉由已合
會自然歸之以二緣立緣本際教用以所有
自因而生一切諸法無爲作者勸使作者自

第六

三

然生已是有爲法斯自然法無有迴還故曰
有爲其有爲法無內無外亦無中間住存欺
惑無合無散由從虛妄思想興立從無明緣
生愚癡業有一切法自然轉行無教造行從
有爲事受其相業因其顛倒以愚凡夫倚名
之故又明智者覺了有爲不可得邊不倚有
爲不合有法乃曰明智明智分別至實有所
造行滅一切爲明智剖判一切諸行虛無欺
詐是諸法者悉無所有成爲自然亦無自然
從意念成一切有爲所以者何不當奉行有

爲因緣惑曉無爲未曾復習有爲緣行若曉
無爲爾乃通耳云何曉之一切有爲皆爲不
眞而無有形悉無邊際無至合會明智觀之
不以有爲至生究竟其有爲者亦無所受悉
以無異有爲無爲亦復無異生宣斷有爲業
是有爲是無爲斯有爲相斯無爲相彼何謂
有爲相知生當死合會別離何謂無爲相不
生不滅不會無別愚冥凡夫不能解了入斯
二義不曉有爲所由起相及滅壞相不住異
相因無相生住於異也若無是相如來所說

從是相生從是相滅住如是相佛言持人如
來所云一切諸法皆無有相以能得成無所
生相無滅壞相無所住相如來敷演無爲之
相是相非相其有爲相不成無爲導師所以
愚冥凡夫所宣道法有爲所起會歸滅盡唯
無爲安以能無爲不生不滅亦無所住故曰
無爲從其所習而今生滅其無所習則無究
盡無行無究無異住處其以真正解其斷慧
不致合會有所起生而有滅也無有異住若
有菩薩當作是觀其有爲法及無爲法無有

第六

不無常見如應不覩有爲及無爲法有爲不
見無爲無爲不見有爲不見異無爲而自謂
念我身有矣真有正是見有爲業無餘有爲
是諦有耳思念妄想其有爲無爲法永無所
想有爲無爲以無所想分別諸想皆斷諸著
以了無爲除去衆緣本淨無緣其因本淨所
覩真正以能曉了悉無所作則無合會菩薩
以能逮是有爲無爲則了諸法不有不無亦
復不倚有爲無爲乃逮正覺也佛告持人若
有菩薩分別五陰曉了諸種解達六入以能

暢知十二緣起剖判四意止五根八道能覺
世俗度世之業明知有爲無爲之事以曉了
是逮解一切諸法之元宣布諸法所不逮者
得意力勢解暢一切諸法章句斷生老死心
不能絕壞能自究竟無上正真道成最正覺

第六

五

寶光菩薩品第十一

佛告持人乃往過去無央數劫不可稱計懸
曠無限爾時於世有佛號紫金山王如來至
真等正覺明行成爲善逝世間解無上士道
法御天人師爲佛世尊其紫金山王如來壽

住五劫諸聲聞衆不可計數諸菩薩會亦不
可限無能稱了知其多少其土熾盛風雨時
節五穀豐熟人民安寧強不陵弱各得其所
心行平等飲食消化不以爲病姪怒癡薄善
自修身家居義教順律清淨彼時如來爲諸
菩薩一切衆生決諸疑網今無懷恨頌宣菩
薩道法之藏時有菩薩名曰寶光聞佛說是
諸菩薩業解陰衰入諸種十八十二緣起諸
根意止八正道行世俗度世有爲無爲即輒
奉受如是精進十二億歲未曾發起姪怒癡

心不貪利養飲食衣服牀敷卧具病瘦醫藥
唯心精修入如是像曉了思惟常修精進盡
其形壽淨修梵行在其佛所壽終之後還生
本土在於人間適生墮地便復出家復受學
斯如是像法曉了奉行復在於彼六十億歲
淨修梵行心不捨遠如是像法慕求不廢復
壽終竟還生佛國其紫金山王如來續存復
在其所淨修梵行一一劫中五返生沒終而
復始其紫金山王如來至真臨欲滅度終五
劫已因是景模博聞無量曉了諸法於五劫

中所可聞受親已從佛諮講解者達其意力
觀戴如來便爲衆生一一敷演開發無量人
皆發無上正真道意佛滅度後正法住一劫
復五百返往來周遊生於人間常出家學奉
是景模曉了正典化無央數不可思議衆生
之類皆入至行寶光菩薩見萬億佛最後有
佛名無量光如來至真等正覺所見授決却
無數劫汝當成無上正真之道過無數劫當
復逮見億百千姪兆載諸佛逮最正覺號決
一切議如來至真等正覺諸聲聞衆不可稱

第六

六

計難可限量諸菩薩衆無央數人其國處世人壽二劫米穀平賤人民安隱是故持人菩薩大士欲逮得是如斯景模曉了正典當精進學受持諷誦是經典要佛復告持人若有菩薩學是經典逮權方便常修四法何謂爲四一曰棄家捐業行作沙門二曰捨于憒鬧習在閑居三曰住清淨戒行不違闕四曰去離懈怠精思不廢是爲四以行是四勤求博聞常立忍辱疾逮四法何謂爲四一曰雖生天下常住中國二曰因值佛世不在邊地三

曰常奉正法終無相違四曰悉除罪蓋無復殃墮是爲四若有菩薩學如是像經典之要輒逮力勢布施清淨戒禁無穢忍辱精進一心智慧聖明無瑕以逮是法致權方便又告持人菩薩學斯立知止足閑居功德懷無蓋第六哀愍于衆生以用大哀入于衆生七然後乃學如是像法解了要行又其菩薩入總持門學於勤修何謂得入總持門而學勤修志慕勤思曉了量法方便觀察奉無限行又解了觀諸定意明諸要法門入不可計因緣正行逮

致如是比像力勢曉一切法分別諸法得意力勢以能曉了斷生老病死志强無怯不失正法乃成無上正真道意逮最正覺佛復告持人若有菩薩通總持門普能曉了一切諸法言辭所趣以用一事入百千事以用道力分別諸法無所不達又若菩薩逮定意門入音聲便入無限定意門雖以得入是了若干品一切法門以入一切諸法道門領宣諸法靡不蒙濟又其菩薩奉行智慧以是慧力曉了諸想勤解想已以是慧力逮一切法疾通

無礙又若菩薩曉了無量定意門行以住是地普致一切佛十力法又若菩薩曉了無量總持門行解不可計定意門力以定意門暢不可限衆法之元以是道地普入諸法靡所不通又其菩薩甚能曉了觀世間行極復分別有爲無爲奉行諸法心所不著有爲無爲行如是像一切諸法疾解諸法逮得慧明又菩薩行權方便勤察一切諸法本無所行雖作是觀不爲世事不著世法亦無所倚如是像法疾得曉了一切諸法分別諸法意力施

財剖判章句斷生老死意行具足是故持人
菩薩大士於是模法而度無極何謂爲四於
斯法典奉如道義勤修正法於斯經典逮無
罣礙普入道慧

往古品第十二

第六

佛告持人乃往過去無極數劫不可稱計長
遠無限爾時有佛號無量光超殊王如來至
真等正覺明行成爲善逝世間解無上士道
法御天人師爲佛世尊其佛世時諸聲聞衆
不可計數大會無限諸菩薩會不可稱載其

佛在世時壽一劫又彼佛土皆以七寶而徧
覆城七寶樹生周匝圍遶以用莊嚴一切諸
樹殊異珍奇交露帳覆又諸樹下皆施師子
牀其諸牀上細好白氎裹樹布牀一切諸牀
瑠璃爲足以赤真珠而校諸樹自然熏香合
成諸葉葉常茂盛而圍旋之其實樹前自然
浴池有八味水其水底沙悉以水精磑礫赤
真珠合成又以三寶造成浴池其諸浴池自
生青紅黃白蓮華又諸池水以七寶作校飾
欄楯一切欄楯地平如掌又其佛土清淨無

穢其佛國土寶樹熾盛猶忉利天晝度大樹
嚴飾巍巍明月珠樹諸億千種充滿佛土其
光悉照覆日月曜令不復現其諸寶樹琦珍
交露出好音聲哀鸞衆鳥天諸玉女歌音樂
聲如是軟美普流佛土無三惡趣不犯諸惡
不爲衆生宣雜句說唯以敷演如斯像法智
度無極是菩薩藏化無央數諸人物衆一日
皆發道心其本發心志存大道便悉具足道
品之法如是持人其無量光超殊王如來至
眞因其方便化不可計無央數載衆生發道

卷六

九

心今生下方去此佛土在彼佛土成菩薩行
佛滅度後正法存立竟至半劫時佛滅度後
正法便沒有一菩薩名意無限從下方佛刹
來生此土其國去斯十佛世界適生未久年
十六歲便捨捐業行作沙門在無量光超殊
王佛所諮受經典臨法沒時爲諸菩薩宣布
陰種一切諸入分別解義聞如是像精進之
行在於斯法所度無極攝權方便因是德本
彼土授決見億數佛普蒙斯法所生之處常
識宿命皆以幼童不娶妻室淨修梵行以家

有信出爲沙門所生之處逮得意力常所受
身成就功勲而最後世逮得無上正真之道
爲最正覺號曰無量光辭王如來至真等正
覺若有菩薩疾欲得成佛逮一切智具足佛
道在後五濁臨法欲沒當勤志誠如是像法
輒受宣布盡以愛樂常行精進最後末俗受
是經典德勲無量諷誦奉行爲他人說福不
可喻

毘陀和五百人品第十三

爾時毘陀和等五百菩薩憍曰兜菩薩即從

座起長跪叉手前白佛言我等世尊最後末
世臨法滅時當受是法住於後世五濁之世
擁護正典持是景模諷誦奉持廣爲人說復
有無數諸菩薩衆各從座起長跪叉手諦視
佛面各興至願我等世尊最後末世被弘誓
鎧受是景模順斯深妙佛所宣慧諸菩薩等
所積德本道品之藏並使具足所在遊居當
擁護法聞是像經益加喜樂受持諷誦宣示
未達深入大猷時佛忻笑口中五色光出徧
照三千大千佛土地六返震動賢者阿難即

從座起長跪叉手前白佛言佛何因笑既笑當有意光明普照地即大動佛告阿難汝寧見此諸菩薩衆住立我前在後末世當護正法被弘誓鎧以救危厄佛識念之往無數劫於諸佛所被如是像弘誓之鎧面從諸佛受斯經法持護三品開導無數衆生之類今是等來在於佛所承三品義受是正法今立佛前然後末世法臨沒時多所開化未達衆生而令受佛三品正法在於賢劫諸佛興見亦當從受千佛訓誨三品正法又將來世諸佛

聖所啓受亦是等阿難諸族姓子功勲名德不可得察莫能稱計所行經法是諸族姓子安隱衆生而供養佛假使如來頒宣是等以受正道安隱衆生皆以不信若不信者長夜不安墮于惡趣又復阿難當爲汝等現其證明如斯等類安隱衆生正使三千世界一切衆生皆由想行故墮地獄假使大衆有地獄中有一人生告地獄人無得恐怖當爲汝等一一導利以時方便出大地獄苦惱之患則以己身一一濟之移著安處一人故無

第六

十一

永樂北藏

持人菩薩所問經

第三九冊

數千歲忍在地獄未曾懈廢普令致安阿難
其人於衆生慈愍弘哀寧增多不出大地獄
立大安隱阿難言甚多甚多天中天佛言假
使彼人顯示神足如是巍巍令衆生類立第
一最有爲之安長樂無患極成弘哀皆逮覆
護其功德福非心所思非言可暢佛告阿難
今故語汝如彼菩薩於大地獄出無數衆立
之永安所愍衆生若合集是前所安隱順和
衆生使濟大難至有爲安百倍千倍億萬倍
巨億萬倍不如族姓子受是像經所以者何

計其所興有爲之安寧有極盡矣不至無爲
不離貪欲不致滅度逮神通正覺之業不成
寂志泥洹之要又阿難是諸菩薩建立衆生
無上大安一切智業又是菩薩以大士法志
學道乘建立佛道度諸衆生立諸聲聞緣覺
之地勸助佛法修菩薩行住于大道斯諸族
姓子勸助衆生行菩薩法不科佛教諮啓大
雄受立弘慈成一切智故功無限佛言阿難
由是正法若干劫中若無數劫不可計限億
百載劫懸邈如是諸佛世尊常不空聞展轉

相教及餘無數億百千姪劫轉復相度使成佛而無窮功故無限所以者何億千百佛本住宿世行菩薩業建立律道斯等之類在在所生受是經典各用勸助逮無上正真之道成最正覺將來之世無數菩薩多所開化不可計衆是以勸助具足佛法成無上正真之道也如是阿難諸族姓子訓立衆生一切智安無上大道欲平等有法父母者正當謂之諸佛菩薩道法父母今是菩薩擁護自歸普得自立是所謂安廐陀和憍曰兜等五百人

第六

十二

等則法父母斯諸菩薩護是正典族姓子族姓女等不違佛教亦不絕一切智本於將來世臨法欲沒爲諸衆生建立大護住在大哀開益一切以是勸助在於末世而安護之不墮惡趣今無數千億菩薩業若無數佛共嗟歎是族姓子等功勲之德不能究竟所以者何是諸族姓名勲至德不可思議佛告阿難佛無數劫億千兆載合集積累是正法寶其受是法族姓子等十方無數不可計會諸佛世尊遊無限土今見在者咸共擁護學是法

者皆令安隱佛言阿難天上世間悉爲是等諸族姓子稽首禮敬歸命諮受十方諸佛悉嗟歎之所演經法以示不逮阿難佛以預印卽是族姓子決一切疑若後末世受如是像無上正法持諷誦說宣布同學是族姓子及族姓女以爲疾近一切智業臨法滅時聞是景模深妙經法懷喜信者佛以授決行菩薩乘如是至真最後末世愛護是法建立己身而愛樂法佛以勸助是諸族姓子及族姓女而不誹謗斯深妙法佛預授決諸聲聞乘見

第六

十三

彌勒佛出現於世諸漏已盡無有愛欲用受信是深妙法故未曾誹謗致是功報佛言若菩薩學聞是深法信樂悅豫亦皆授決在於彌勒如來世時出家學寂而復誓願乃有殊特佛謂是族姓子女德本調柔功勲無際臨法欲沒最後末世受斯深法奉行精進德不可量巍巍如是囑累品第十四爾時持人菩薩前白佛言願佛建立以轉法者不求名利最後末世聞是正法顯發忻悅

受微妙義以是之故疾解諸法逮分別慧速
得意力剖判諸法曉了道慧所生之處識念
不忘以大法光照於十方佛言持人若有菩
薩觀是法品大智慧業無極明本積大功德
不可限量若將來世受是法品持諷誦讀及
餘深經菩薩篋藏諸度無輕勤心奉行魔事
因緣不能得便不為罪蓋之所覆蔽佛預授
決見兩三佛輒當逮得無所從生法忍其得
忍者亦當得是無上道品自解諸法而得自
在嚴淨佛土具足聲聞受其道教奉菩薩行

如是持人佛下印封斷一切疑最後末世現
得四義自在之業行菩薩大士法受是經典
而擁護之被弘誓鎧何謂為四一曰受已德
本甚大無極不可限量不可計會二曰當為
衆生顯發善元三曰諮受如來正法經要四
曰執持法藏無央數佛所宣道化是為四復
有四法最後末世將護深法何謂為四一曰
攝取精進在弊惡世受行正法二曰若在厄
難第一苦毒諍亂正法所持法品人共鬪時
化令和合擁護正法三曰行發忍辱具足仁

卷六

十四

和四曰在於末世心不懷恨往來周旋常行
慈愍是爲四得致深法疾速一切智爾時毘
陀和憍曰兜五百菩薩及餘菩薩聞佛說是
道品正法咸住佛前心自念言於後末世擁
護正法佛以右掌摩諸菩薩而告之曰諸族
姓子佛無數劫而積習是無上正真道成大
寶藏甚用勤苦忍遭困厄所濟無限使得大
安捨身之安而憂一切乃致道法成最正覺
以累仁等若有學誦逮是法者廣爲四輩而
敷演義若三品法欲毀壞時當建立護爾乃

振揚無極大光佛重以累族姓子等如來猶
父諸賢如子佛猶國君諸仁如臣父慈子孝
君正臣忠天下和平吾無數劫習是三法道
德寶藏令普流布八極上下諸天人民一切
慈孝自歸命佛佛以大哀皆共蒙濟爾時諸
菩薩衆從毘陀和憍曰兜等五百群衆稽首
佛足前白佛言承佛聖旨任力盡意將護末
世佛所宣教惟願如來建立垂恩最後末世
今斯正法道寶之藏使普流布八方上下一
切皆蒙佛加威神說是法品有無央數不可

第六

十五

計會諸菩薩衆得一生補處德本道慧皆以
 備悉無數億千諸天人人民皆發道心佛悉授
 決於將來世皆得佛道各有名號佛說如是
 持人菩薩及一切菩薩颺陀和憍曰兜等五
 百群衆四部衆會諸天世人阿須倫聞佛所
 說莫不歡喜作禮而去

持人菩薩所問經卷第四

音釋

匱 求位切 匱乏也
 疊 計與切 毀隙也 疊毛徒協切 毛布也
 颺 蒲活切
 篋 篋切

永樂北藏

持人菩薩所問經

第三九冊

图书在版编目 (CIP) 数据

永乐北藏/赵朴初名誉主编. -北京: 线装书局, 2000. 2
ISBN 7-80106-052-0

I. 永… I. 赵… II. 大藏经 N. B941

中国版本图书馆 CIP 数据核字 (1999) 第 73752 号

永樂北藏 (二〇〇册)

出版發行 綫裝書局 (北京朝陽區春秀路太平莊十號)

責任編輯 李立

裝幀設計 顏菲菲

印 刷 中國地質科學院五六二印刷廠

版 次 二〇〇〇年三月第一版第一次印刷

印 數 〇〇一——一〇〇〇

書 號 ISBN 7-80106-052-0/B·1

定 價 八八〇〇〇 圓

ISBN 7-80106-052-0



9 787801 060525 >